

四庫全書

集部

欽定四庫全書

集部
震澤集卷一

詳校官中書_臣瞿 熙

中書_臣劉源溥覆勘

總校官進士_臣朱 鈐

校對官編修_臣盧 遂

謄錄監生_臣施 華

欽定四庫全書

集部六

震澤集

別集類五

明

提要

臣等謹案震澤集三十六卷明王鏊撰鏊有史餘已著錄鏊以制義名一代雖鄉塾童稚纔能誦讀八比即無不知有王守溪者然其古文亦湛深經術典雅道潔有唐宋遺風蓋有明盛時雖為時文者亦必研索六籍汎覽百

氏以培其根柢而窮其波瀾鑿因頓名場老
乃得遇其澤于古者已深故時文工而古文
亦工也明史鑿本傳稱鑿上言欲仿前代制
科如博學宏詞之類以收異才六年一舉尤
異者授以清要之職有官者加秩數年之後
士類濯磨必以通經學古為高脫去謏聞之
陋時不能用又稱鑿取士尚經術險詭者一
切屏去弘正間文體為一變則鑿之所學可

知矣集中尊號議昭穆對大旨與張璠桂萼
相合故霍韜為其集序極相推挹至此於孔
門之游夏未免明黨之私然其謂鑿早學於
蘇晚學於韓折衷於程朱則固公論也其河
源考一篇能不信篤什所言似為有見而襍
引佛典道書以駁崑崙之說則考証殊為踈
舛此由明代幅員至嘉峪關而止輶車不到
之地徒執故籍以揣摩之其影響模糊固亦

不足怪矣乾隆四十六年四月恭校上

總纂官臣紀昀臣陸錫熊臣孫士毅

總校官臣陸費墀

震澤集序

文之傳三人品一也學力二也才格三也以人品者人
為世重者也以學力者學為世師者也以才格者文由
才奇者也世之文由才傳者吾見之矣合才與學者我
未之見也合才與學蓋有之矣合人品與學與才我殆
未之見也故曰文之傳也人品也學力也才格也三者
具焉上也二具焉次也一焉又次也守谿先生早年詞
氣如風檣駕濤如逸驥馳野如銀河注溟如長虹橫漢

如列缺劃雲如駛颶之嘯六合可謂雄矣晚年脫枝落
英尚淡崇質大羹不和大烹不割玄酒不麴大音不弦
古鐘石磬俚耳不諧蓋雄而古者也故曰公文可傳也
才格也一也先生早學於蘇晚學於韓折衷於程朱是
故觀怒懼箴知公於心學力矣觀慈湖記知公於異端
辯矣觀昭穆對觀尊親議知公於天倫明矣觀教太子
知公慎天下大本矣觀講學觀親政觀邊事議知公康
濟之懷矣觀歷代官制知公考古矣通之識矣觀諸序

記觀諸東書觀諸碑銘觀諸詩歌知公黜浮崇古之大
畧矣是可傳矣故曰公文可傳也學力也二也公於壽
寧侯舊也壽寧侯戚密椒官大臣無恥者趨焉公自壽
寧顯後不通字姓君子曰公之介也武皇帝時瑾權橫
赫無恥者趨焉公決去人曰去則忤瑾或怒不測公曰
吾不得吾職則去禍福奚虞焉天下乃知有大臣之烈
故公之出也人曰瑞麟威鳳之游也公仕也人曰景星
卿雲之見也公歸也人曰雪冬柏松之秀也公沒也人

曰夏鼎周彝之藏也公也無忝名臣也已故曰公文可傳也人品也三也又曰才格也學力也人品也胥賴以成者也三善有一焉猶可名世況於公具焉或曰公在孔門如何謂厓子曰公若及孔門宜列游夏之間性善之對則式孟氏人心道心之論宜式程朱南海霍韜渭先書

欽定四庫全書

震澤集卷一

明 王鏊 撰

賦

弔闔廬賦

昔闔廬之霸吳兮卒託體乎茲丘慨往跡之日湮兮曾
不可乎復求峯巒紛以環合兮浮屠臺殿鬱以相繆叶
忽平岡之圻裂兮斂池瀚淪而深黑俯莫測其所窮兮
仰不見乎白日兩崖鉅峯而闔嚙兮又巉巖而斗絕信

天造之險巖兮為神怪之窟穴將舉首而闖其淺深兮
先魂驚而疹栗彼秦始之雄哮兮力驅石而填海將破
山而求之兮藐不知其所在宜元之之不信兮謂往牒
之我紿歲正德之協洽兮劔池忽焉其枯涸何昔日之
淪淪兮今山徑之嶢峩伊水旱之常數兮非予心之所
度石谿研而雙敞兮類墓門之頽駁試往造乎其間兮
將舉武而旋却始沮洳以忽明兮諒欲退而不可儼奏
題之可捫兮森怪石之欲墮豈漆鐙之將滅兮若有俟

乎王果咲吳王之物化兮求彷彿其不見想瀕池之既
塵兮何有玉鳧與金雁彼槃郢與扁諸兮疑此語之為
幻何千年之神闕兮忽一朝而呈露也旋黯然而復閑
兮殆神物之呵護也前驪山之強項兮後會稽之妖珈
錮南山其猶有隙兮信多藏之為害獨空空兮以保全
兮因茲丘而增慨

雙松賦寄同年謝少傅

鬱鬱雙松之並峙兮一不知其封殖之歲年幹輪囷而磊

何兮文章錯而斑
編蒼虬擎空以騰上兮驚螭躍地以
屈蟠萬木凌冬而僵死兮獨青青其不刊似端人義士
之立朝兮正色儼然曾不可乎犯干彼幽人之何知兮
日坐對而盤桓朝予儀其挺直兮夕予挹其清寒固非
藍田之棄丞兮抑豈華陽之真官願千秋以相保兮歷
冰霜於歲殘使明堂大厦之棄遺兮非予心之所患

去思賦

并序

三山林侯利瞻知吳郡甫二年推分省滇南闔郡之民

咸戚嗟若謂侯甚宜于民而遽敘以去予謂循吏之難
久矣自頃權奸柄政政以賄成一時在位者因競為培
克以入私門不惟國法有不及雖士之清議亦不復行
曰彼以緩禍也而莫之罪焉於是相師成風雖平日稍
知慕義者亦且肆行而莫顧曰吾以緩禍也於戲綱紀
其壞乎廉恥其墮乎于斯時也有能潔然自守終始不
洿者幾人此林侯之政所以尤難而重吳民之思也予
乃推願留者之意為之詞

猗嗟林侯兮胡不為我少留世方競以貪恠兮侯獨端
靖而好脩莅民曾幾時兮惠政日以旁流念往歲之
大祲兮分轉死于溝渠賴我侯之敷政兮不競練而于
于哺我兮被我育我民兮如母我耕于野兮我出我途
寇偷無戒兮吏靜不苛仰有旌兮俯有稚非侯之仁兮
誰使皇鑒孔明分明且不頗嗟滇之人兮其獨謂何攬
侯裾兮繫侯馬願侯重來兮不聊此暇

槃谷賦

夫何太湖之淼茫兮峙雙玉於西東蔚凝紫之巉巖兮
峯巒抱而中空渡渚汪洋而交貫兮仍島嶼之無窮稻
畦鱗次以櫛比兮美西崦之寬宏亭臺儼其高下兮閤
巷互而相通嗟夫人之好脩兮乃行義於其中握瑾瑜
而不耀兮甘自混於凡庸朝出耕而暮讀兮澹浮名之
夕空非夫人之獨善兮慨斯世之不庸不吾庸其亦已
兮信橫目之為恫仰觀山之嵯峨兮俯翫水之溶溶俯
仰山水中以自得兮將有言兮是從將無言兮是從

待隱園賦

冢宰楊公作園于京口曰待隱謂將歸老乎此也而遭際明時願莫之遂予為作賦以明其初志云詞曰

我滇于家兮邈雲山之阻艱慨歲暮予安歸兮聊稅駕乎江干稍葺茅以為宇兮又繚石以為垣羌藝蕙之百本兮忽覩竹之千竿初予與予心約兮逝將於此乎盤桓何皇恩之翕赫兮雖百身其猶未閒既授鉞於閩外兮節制通乎三邊旋持衡於廟堂兮坐進退乎百官誓

捐軀而不悔兮顧初心其猶自憐悵松筠之無主兮恐
猿鶴之多怨彼出處之難定兮伊自古而則然迨國恩
之既酬兮將不日而來旋

吳子城賦

予每過吳故墟未嘗不慨想其盛而悼其衰也故為之
賦

秦伯遺墟干將故里臺閣暈飛冠蓋鱗次喟彼荒郊羌
何為乎城之裏但見愁煙鬱而四積悲風慘而時起頽

墉突阜剝水殘濠野雉朝雊鵠鷗夜號沉矛折戟墮珥
遺翹漸漸惟夢之秀離離彼稷之苗父老告予曰此吳
王之遺宮也方吳盛時志大功高入楚柏舉敗越夫椒
城規方於八卦門僭擬於三朝跨長洲之茂苑館芋羅
之豔妖帶以錦帆之涇壓以金母之橋爰有涼臺溫室
鏤楣繡栢風亭月榭碩璧椒塗飾以璆琳琅玕間以木
難珊瑚鳴珮鳧簪高冠鵠趨自謂百世君之豈意至於
是耶吳祿既更歷代崇飾春申夏桃秦皇刻石危亭爰

夷雕欄紆直齊雲之樓凝香之室木蘭之堂交映翕赫
疊石則截業嶠嶢鑿治則困潏澄碧蘭芷羅生乎其間
竹松駢列於其側羅綺爭春而妖冶歌鐘入夜而嘈雜
韋白耽於塗玩皮陸侈於酬答迨宋迄元更為治所雙
蓮四照池光春雨歲時觀游麗無踰者而何至於是耶
蓋自元政隳羣雄騖白駒離酋乘間竊據挾嘉湖杭以
自雄擢黃蔡葉而為輔盛稷下之文儒忽太湖之飛渡
煬戀迷樓卓矜郢塢倏天兵四面以重圍金城百雉而

莫固技殫九攻蒼黃一炬歷代繁華可憐焦土遂使燕
巢再燬麋鹿重游竭南國之脂膏坐受其困激東溟之
波浪莫洗其羞且夫傾宮阿房非不麗也鉅橋瓊林非
不富也崤函鞏洛非不固也自古如斯曷之故也豈仁
義不脩燕安之可畏耶將氣運靡常盈虛之有數耶惟
是吳墟殷鑒斯在前既顛隳後仍荒殆登茲城以徘徊
寄千古之一慨

洞庭兩山賦

楚之湖曰洞庭吳之山亦曰洞庭其以相埒邪將地脈
有相通者邪郭景純曰邑山洞庭巴陵地道潛達傍通
是未可知也而吾洞庭實兼湖山之勝始山特為幽人
韻士之所棲靈仙佛子之所宅至國朝名臣徹爵往往
出焉豈湖山之秀磅礴鬱積至是而後泄於人邪東岡
子曰山川之秀實生人才人才之出益顯山川顯之維
何蓋莫過於文兩山者秘於古而顯於今其實有待乎
無用辭子曰然乃為之賦其詞曰

吳越之墟有巨浸焉三萬六千頃浩浩湯湯如滄溟澌
渤之茫洋中有山焉七十有二眇眇忽忽如蓬壺方丈
之彷彿日月之所升沉魚龍之所變化百川攸歸三州
為界所謂吞雲夢八九於胷中曾不蒂芥者也客曰試
為我賦之夫太始沕穆一氣推遷融而為湖結而為山
爰有羣峯散見疊出於波濤之間或現或隱或浮或沉
或吐或吞或如人立或如鳥憲或如鼃鼃之曝或如虎
豹之蹲忽起二峯東西雄據有若巨君彈壓臣庶又若

大軍之出千乘萬騎旌幢葆蓋繚繞奔赴東山起自莫
釐或騰或倚若飛雲旋飈不知幾千百折至長圻蜿蜒
而西逝西山起自縹緲或起或伏若驚鴻翥鳳不知幾
千萬落至渡渚迴翔而北折試嘗與子登高騁望近則
重岡複嶺喊呀摩豁縈洲枉渚蜚螭緬邈遠則煙蕪渺
瀰天水一碧帆影見而忽忽無飛鳥出而復沒靈巖則返
照孤稜弁山則輕煙一抹此亦天下之至奇也若乃長
風駕浪歎山欲野足使人魂驚而汗駭及其風日晴煦

穀紋連漪又使人心曠而神怡至於瑤海上月流光萬頃星河倒懸盪漾山影又一奇也遙山霽雪凝華萬疊玉鑑冰壺上下相合又一奇也風雨晦明頃刻異候煙雲變滅只尺殊狀雖有至巧莫能為像試嘗與子弔古尋幽則有迴巖穹壑竊窳相通琳宮梵宇暮鼓晨鐘壽藤靈藥美箭長松金庭玉柱石函寶書靈威丈人之所闕也貝闕珠宮繡穀鳴璫柳穀書生之所婉也翠峰杜圻范蠡之所止息黃村角頭綺皓之所從逝也而闔廬

夫差之跡尤多存者翫月之渚消夏之灣牧馬之城圈
虎之山練兵之瀆射鶚之巖出金鐸於淺瀨逸梅梁於
驚湍他若毛公燒丹之井蔡經煉藥之墩聖姑絕雉之
塘雪竇降龍之淵其石則岌嶭嶙峋瘦漏嵌空牛竒章
有甲乙之品宋艮嶽有永固之封其泉則困淪甯沸甘
寒澄碧墨佐君表無礙之名天衣禪留悟道之跡斯地
也孫尚書欲下居而不能范文穆思再至而不果豈如
吾人生長茲土依巖架棟占野分圃散為村墟湊為闌

關桑麻交陰鷄犬鳴吠里無郭解劇孟之俠市無桑間
濮上之音婚姻相通若朱陳之族理亂不識若武陵之
源佛狸之馬跡不到周顒之俗駕自旋星應五車地絕
三斑盧橘夏熟楊梅日殷園收銀杏家種黃甘梅多庾
嶺梨美張谷雨前茅茗蟄餘萌竹水族則時裏之白鱠
殘之銀魴鱸鮒鯊自昔所珍吾且與子摘山之毳掇野
之茸割湖之鮮釀湖之醲泛白少傅月夜管絃之舟和
天隨子太古滄浪之歌弔吳王之離宮扣隅凡之靈窩

凌三萬頃之瓊瑤覽七十二之嵯峨其亦足樂乎彼岳
陽彭蠡非不廣且大也而乏魏我之氣天台武夷非不
高且麗也而無浩渺之容蓋物不兩大美有獨鍾茲謂
人間之福地物外之靈峰是固極游觀之美而未知造
化之工且夫天地之間東南為下非是湖為之尾閭洩
之瀦之則汎濫橫溢江左之民其為魚乎懷襄之世湖
波震盪非是山為之砥柱鎮之繞之則奔激暴囓湖東
之地其為沼乎唯夫天作之寬以納以容地設之隘以

襟以帶禹順其流分疏別派三江既入萬世允賴而後
吾人乃得優游於此蓋至是而後知造化之意深神禹
之功大評曰

吾何歸乎吾將歸乎湖上之青山世與我而相遺超獨
邁其逾遠海山兜率不可以驟到非茲峰之洵美兮吾
誰與寄此高蹇

詩

迎駕

象輦犇騰馬輦馳後來人輦獨逶迤
緋袍夾道千官立
銀甲分行萬國隨
太液風微旗盡旆
蓬萊雲近仗潛移
太平二十年天子
正是文章極盛時

春日應制

奉天朝罷曉瞳矐
勅使傳宣籞苑東
好雨晴時三月裏
鑾輿遙過百花中
東皇默運無言化
南國新收不戰功
歸坐明堂還布德
豫遊分與萬方同

宮闕沉沉晝漏長
步從黃道坐青陽
六龍整馭天行健

萬象含暉地道光雨足漸臺楊柳色風迴合殿杏花香
太平有象羣方樂宵旰雖勤也不妨

夏日應制

水晶宮殿晝沉沉別院春歸碧樹深南陸迎長欽馭日
東臯早久望為霖歷中星火脩堯令絃上薰風識舜心
幾務了時多暇日試開黃卷一披尋

崢嶸日脚火雲紅竹館荷亭坐晚風天下誰為無暑地
月中寧有廣寒宮冰頒玉井恩施溥露憶金莖渴思空

多少蒼生方病暵為霖須仗傅巖翁

雨後長安街忽成巨浸

大雨西來勢壓山長衢浩浩起波瀾始知滄海桑田變
只在陰晴反覆間

雨錢

成化丁酉六月九日京師大雨
雨中往往得錢錢皆側倚瓦際

蒼天似憫斯人困故向雲中撒與錢錢若了時民又困
何如只賜與豐年

舟次張秋冒雨上讀徐武功治水碑

長堤十里隱如虹，來往行人說武功。
降水突來無充濟，鐵牛屹立尚西東。
淇園竹下人初駭，鄭國渠成運自通。
讀罷穹碑人不見，北來凍雨洗寒空。

金山

大江中峙小崑崙，勢遏洪濤幾欲奔。
萬古乾坤限南北，一方鐘鼓自晨昏。
雲低壯固山爭出，潮落東洋海半吞。
汲得中泠自煎試，月團新賜出詞垣。

自都下還吳寄翰林劉景元謝于喬二同年

大通橋下水送我到蘇州君心與之同
泊泊日夜東南流千山萬山隔不斷
天南天北長悠悠燕南車塵高十丈
回首湖山幾興望楓橋忽聽寒山鐘
却望燕南在天
上白玉堂黃金闕君在京華我吳越
鴈飛木落洞庭波
鷄鳴海色長安月

靜觀樓成衆山忽見

山居盡日不見山樓上山來自何處
中峰獨立羣峰

隨頭角森森出林樹澄湖萬頃從中來浪捲三山欲
飛去得非奮迅從地出無乃飛騰自天下我來樓上
何所為長日觀山與山語東風吹醉還吹醒山自為
賓我為主

登樓諸山忽不見蓋為雲霧所隱

蜃噓臺閣倏然生鰲背蓬壺流不住我家樓子豈亦然
點點遙峰天際露朝來一望忽失之極目蒼蒼但煙霧
當時何處忽飛來夜半何人偷負去

風琴

天風泛絃絃自鳴
案間雲影波紋驚
非韶非濩非咸英
依然誰唱還誰賡
不為音節音節成
乃知自有無聲聲
一洗世上琵琶箏

青山

青山上有一片石
我醉欲眠此其席
舉眼望天天黑色
世間何處有此適
歌聲不斷雲自飛
天風飄飄吹我衣
山雨欲來還不歸

登西馬塢

一上高山望五湖，雲飛盡處是姑蘇。
人家隱隱煙中有，帆影依依天際無。
俯仰兩間雙短鬢，往來千古一蘆盧。
仲淹自是多憂者，廊廟江湖恐未殊。

雲山圖二首

遠山隱隱半欲沒，近山巍巍高獨出。
近山遠山出沒間，霧斂煙霏兩明滅。
山南山北殷其雷，天雨欲來還不來。
餘輝倒映半巖赤，靈籟中含萬壑哀。
縈迴鳥道梯空去。

忽有人家傍山住懸崖一道玉泉飛小橋歷歷行人度
愁心三疊江上山世無燕許誰能賦

天將雨山出雲平原草樹杳莫分須臾雲吐近山出遠
岫婪酣吞欲入映空明滅疑有無先後高低殊戢戢想
當畫史欲畫時磅礴含章幾回立忽然紙上玄雲翻雨
脚旋來風勢急至今蔚蒼吹不散白晝高堂空翠濕雷
聲虺虺天冥冥山前不見行人行鷓鴣啼斷山雨歇石
橋小瀨湔湔鳴叢林屋角參差倚落紅滿庭人未起憑

誰說與顧虎頭寫置幼輿巖石裏

棄婦怨

妾命薄妾命薄妾命自薄君不惡玉顏自昔誤主恩得
奉餘光侍帷幄兔絲橫倒附青松豈謂青松久難托前
時糟與糠妾與君同怡今日梁與肉知君惟對誰君如
大江水妾如水底石江水日夜流不回石抵狂瀾終不
易哭城城亦圯灑竹竹亦斑土木猶可感君心終不還
終不還妾命薄妾命自薄君不惡

相城謠

通判邵侯福莅吳之三年相城民有以曲防告者侯為鉏去之民甚快焉

東南地下衆水赴之厥有大海維水之歸誰為曲防水
失其性犇軼橫流為厥民病原田每每隰乃湯湯咫尺
之間有豐有凶邵侯下車咨我民瘼首議除之衆議乃
格衆言洶洶侯為不聞怨斯我任惠歸爾民防之未決
水不由正一郡之憂百夫則幸防之既決水逝其沛百
夫之咨一郡斯快頻年吳下歲乃大豐歲乃大豐郡侯

卷一
之功相城鼓舞白茆企而白茆相城利害百之維行不
疑維功不隳邵侯去矣誰其嗣之

聽人彈琴

薰風長日庭院深有人危坐絃鳴琴悽其始作履霜操
劃然忽造崩山音大絃春溫小廉折大小廉溫無間歇
月斜窓戶鴻飛高秋入園林蟬語咽撫絃按指忽變之
嫋嫋餘音如欲絕欲絕不絕還丁丁幽谷幽禽飢啄雪
黃昏風雨勢振天天青雨歇山娟娟衣冠相對坐終日日

與文王孔子相周旋煩君試作南薰調去和虞韶向廊廟
望海行

日沒處天盡頭尾間東注何時休蓬壺閬苑在何處聞
有金銀宮闕五城十二之瓊樓我欲往從之但見洪濤
巨浪從我今誰由何當挾飛仙汗漫同遨遊弱流萬里
等閒度遍覽三山與十洲

卧病

一鐙孤館夜寥寥八月文園病未消動覺此身成附贅

靜觀物理自逍遙長纓頓驥悲千里尺瀆旋鱗困一朝
之子不來秋欲晚空庭風葉雨瀟瀟

陪夏憲副正夫游石湖

東風湖上試春衫樹杪飛橋破石巖廢宅草深悲往事
斷碑苔沒認餘劉上方雲影層層塔震澤波光隱隱帆
弔古登高興無限歸途西日在松杉

檜軒

武山之西為積金有隱士曰吳君思復思德
余弱冠歸自京師咸以國士見待後余及第

歸過其廬而二君已即世
其弟思政乞余作檜軒詩

虎山鳩峯兩岬嶸西金亭亭宛如鑿問誰居者兩吳君結髮
清修老彌恪當年何人送檜栽栽向庭前小芸閣時時兄弟
坐兩偏偏袒吟哦雙露脚我行十載還過之翠壁蒼崖人去
邈庭中老檜參天長昔拱今來十圍弱古苔駁落文章隱蒼
玉拳竒根節錯半空時戰風雨聲平地恐作蛟龍躍萬牛回
首亦不動遮莫千秋卧雲壑木強取柱柔取束社櫟自全終
自作樊侯種漆已闕疎魏王貽瓠還護落何如種樹還種德

德樹同榮掃寥廓為君封殖表雙高他日山人過必作

立春

空山月上雪未消土牛擊碎城東郊報道春來春不見
朝來試看梅花梢

三十五初度

人生七十古來少嗟我如今已半之來日更添如許久
餘生能得幾多時功名似鷗長遭退學問如船逆上遲
萬事悠悠只如此青山能負白雲期

遼城懷古二首

並馬尋涼過遠郊，偶從野叟問前朝。
雨摧故壘逢遺鏃，月暗荒臺夢墮翹。
千古河山還王氣，一時人事憶金遼。
如何宋紀年三百，獨讓周師過瓦橋。

小橋瀲灩空流水，往事悠悠祇斷垣。
冠蓋六州皆石晉，河山百戰又金源。
黍離不盡行人恨，木葉空歸杜宇魂。
千古登臨成一慨，幽燕今日是中原。

送陸汝昭通守東昌

羨君拔擢之官去愧我蹉跎出餞遲門外不知車幾兩
城邊空復立多時文章自小曾推陸畫諾於今合付資
他日東昌為過客風謡誰采道傍詩

送戚時望僉憲之湖廣

逢君未久送君行十載同年幾日情平獄舊推于定國
按刑新過漢陽城鴈回千里書須寄春到三湘草自生
收拾楚材歸藥籠湖南賓客總知名

送吳汝器下第歸吳江

羊家裙上墨如新兄弟才名自昔均

其兄汝礪
新第進士

二鳥出

為南國瑞一枝回羨曲江春戰場有作還推子當局多
迷莫笑人笠澤湖邊平望里且將書卷伴絲綸

李承芳承箕下第以詩投贈酬之

青藜入夜晃秋毫兩意相求苦不遭神駿並為千里足
驪黃真誤九方臯亡弓亦得君誠達當局還迷我亦勞
把酒題詩成一笑楚天空闊鴈行高

試院贈外簾呂推官

直

棘垣深鎖夜厭厭每聽鐘聲識外簾咫尺相看成不語
兩心對越幸無嫌青鐙晃晃官曹接白戰沉沉號令嚴
一月春光人不見歸來庭草落紅纖

送曾侍讀士美之南京

十年左掖共追趨春殿曾傳第一臚梁顥成名誰謂晚
匡衡抗疏未為迂從來杞梓多從楚近日衣冠總向吳

時翰林三人
同往南京

最愛金陵好山水他年玉署肯容無

送楊侍讀維立之南京

二月南宮看柳條知君已上秣陵橈楊家製作多傳後
蘇子文章合在朝夢草池邊歌郢雪雨花臺上望江潮
誰知東上門前路此後行來分外遙

時予與維立
同在內書館

葉文莊公夫人壽詞

文莊老去吾猶及夢想依稀記尚真挾策未能為弟子
升堂還得拜夫人中吳文獻家聲遠少宰丹青貌像親
一曲南飛憑去鶴西風江上采繁蘋

送彭閣老還江西

白麻新拜內尚書黃閣沉沉仰步趨四海謝安何日起
一年司馬要人扶相門北闕存衣鉢祖帳東門入畫圖
知有寸心猶捧日不殊廊廟與江湖

送楊尚綱楊名甫毛貞甫陸全卿四進士歸省

朱書華燭夜縱橫忽見篇章眼獨明暗裏投珠人莫顧
空中懸鑑我何情相逢一笑平生友比去重來幾日程

路指婁江東下急夷亭斜日暮潮生

右尚綱

南宮筆勢見翩翩固也平生意豈然不伐子甘為益後

虛名吾自愧盧前杏花燕市春隨馬楓葉錢塘夜泊船

舊日和凝今老矣登庸衣鉢尚須傳

右名甫

接官長傍驛邊河來往君家較獨多已向交情知鮑叔
豈因筆勢誤東坡還鄉未覺關河遠感舊無如歲月何

南望吳門君獨去西風落木洞庭波

右貞甫

文章一見一回妍玉樹分明在眼前記得陸機年二十
親看賈誼策三千杏花燕月人俱遠楓葉吳霜思獨懸

南去河流乾欲斷關津先放彩衣船

右全卿

贈琴士楊凌

家藏無長物猶有一張琴獨抱中空節能含太古音老
來唯信手妙處不傳心歸去北山北秦箏世所欽

咏並蒂蓮三首

陰陰夏木草堂幽不盡閒情獨倚樓風捲綠衣初却暑
露垂紅粉解迎秋午眠隔岸鴛鴦穩晚浴澄波翡翠羞
遙憶故人池上樂新涼鼓棹重淹留

林塘雨過納涼時箕踞平臺手一卮影故相依心最苦

絲仍不斷意俱遲
新妝雙照梧桐月
鬪艷低垂楊柳枝
城上烏啼人未睡
憑闌欲寄美人思

疎竹蕭蕭風乍涼
看花賓客滿華堂
六郎醉後誇新寵
二妹朝回鬪晚妝
草種宜男應減色
花開多子不聞香
主人只恐朱英老
遮莫題詩戀夕陽

喜雨

五月亢陽驕原枯
澤欲焦朝恩推蕩蕩
暮雨聽蕭蕭
造化功何有蒼生望
已翹倚闌看不厭
詩和野人謠

送趙栗夫歸省吳江

秋入吳江一葉飛，歸來游子著朝衣。
鄉人始識文章貴，仕路休嫌定省稀。
寶帶橋邊舟汎汎，白雲司裏樹依依。
路經震澤人應問，太史周南胡不歸。

送僧歸洞庭

好古多游寺，懷山喜見僧。
此來成北道，好去問南能。
施飯逢溪瀘，函經被雨騰。
誰同西崦裏，竹屋夜深鐙。

題夏正夫游石湖虎丘詩卷

石湖煙水虎丘雨上國還從卷裏看
高人過作十日飲
故事畱與他年觀亦知南國有西子
誰謂東山無謝安
更欲相從尋勝處高崖磨認墨痕殘

雨窓詩意

對牀一夜彭城雨流落千秋伯仲情
鐙火五更雙夢短
江湖萬里一身輕吳雲未薄燕鴻冷
薊樹初殘越鳥驚
我亦緬懷終鮮恨西堂獨夜正愁生

寄嚴守邵文敬

一麾出守還為郡我欲畱君愧未能空使思南歌召父
定從江上謁嚴陵吳山越水多相入政事文章合並稱
若到郡齋逢北鴈為拈秃筆掃溪藤

文敬善草書
曾知思南

送楊琴士

秋月城頭夜擣衣客心如鴈只南飛築宮燕市人何在
鼓瑟齊門事竟違古調不傳空有譜我琴雖在已無徽
贈行刺有名公句莫道知音世所稀

獨坐

世事紛紛總未真
閉門聊看靜中身
郢人已去誰為斲
野老從知只愛芹
前度劉郎非舊日
後來揚子定何人
悠悠今古無窮事
歸釣吳山楚水濱

送同年范以貞還任寧國

不見范侯來已久
忽聞高論尚孱顏
榜中漸覺同年少
席上難逢半日閒
到任祇嘗寧國水
題詩時對敬亭山
謝公遺刻煩收拾
多在荒煙野草間

謁文丞相祠

義氣橫天白日陰巍然遺像學宮深千秋不化長弘血
百折難迴豫讓心自昔奸諛誰不死如今元社亦銷沉
黃昏柴市風沙慘回首行人淚不禁

姚少師像

下馬摩挲讀古碑欲詢往事沒人知獨畱滿月龕中像
便是凌煙閣上姿頰隱三毛還可識功高六出本無奇
一朝社稷歸真主還是矐然老衲師

游華嚴寺

寺在京城之西山

捫蘿陟巘路登登人在山房喚不應犬吠林間知有客
鳥啼洞口若無僧危闌一覽總堪了絕頂重來殊未曾
古洞深溫誰氏子儼然趺坐對南能

元耶律丞相墓和匏菴韻

西山幾度只空還好事懷賢厚我顏蒙古有公方用夏
居庸從此不為關猶聞宰地三髯委自笑登高兩足頑
今日幽燕歸聖代可憐埋骨尚荒山

狄梁公祠次匏菴韻

歌中嫵媚亦誠豪
覆體何人脫御袍
鍊石有方天可補
壓弧無驗鬼空號
參苓入籠還為用
稂莠當堦不受媯
南望河陽如在眼
青山無限白雲高

昌平劉諫議祠

荒灣野木古城隅
何處昌平是舊廬
氣帶幽并多感慨
策如晁董亦迂踈
同時下第誰云屈
此外求言總是虛
不盡懷賢千古意
執鞭無路欲何如

戊申歲

百二昌期見戊申神孫聖祖兩王春撫綏無外乾坤舊
洗濯重光日月新一代謳歌還屬啟百年禮樂定先秦
明良千古今朝事大老何當起海濱

恭送孝穆皇太后梓宮遷祔茂陵

露宿千官繞風悲萬木號配天同浩蕩啟聖亦劬勞紅
日低黃屋青山映白袍誰云金口遠還接茂陵高

雪

二月燕南煖未歸晚風吹雪弄霏霏乘春且作豐年瑞

和月還為午夜輝重壓竹枝低欲折輕兼柳絮濕還飛
小臣欲擬陽春曲變理何人秉化機

送劉侍講景元使交南

莫辭旌旆拂炎蒸專對還推賜也能石過鬱林真可載
山高銅柱更須登中朝正朔行無外絕徼殊妝覩未曾
別後玉堂長見夢富良江上夜深鐙

送呂丕文給事使交南

乾德初升九五爻使臣頒朔到南交尚方瑞獸新裁服

炎海人魚定入庖歲貢已茅仍陸續春歸行李亦寥梢
還朝借我南游錄土俗民風要一鈔

送蔡進之還洞庭

夢魂長遶太湖邊折柳官亭又一年家世西來峯縹緲
客心東去水潏潏林間詩社誰為長吳下鄉音我亦便
撩亂煙花過寒食東風胥口喚行船

送姪寵

遠別憂不忘病別憂其那病也在汝身痛也仍在我道

途歷崎嶇風濤恣軒簸欲畱諒不能欲去夫豈可起居
飲食間安得盡帖妥出入戒垂堂旦暮親藥裏安心是
良方坡老語非左我生本衰遲我命亦輶軻子行從此
歸我去幾時果霜天笠澤帆夜月楓橋火故鄉風土宜
見此病亦頗到家平安書早寄北來舸

海蝦圖

茫茫大海浮穹壤日月升沉鼇背上其間物怪何所無
海馬天吳大如象有魚如屋蟹如帆蝦最細微猶十丈

鬚鬚怒氣須如戟力戰洪濤欲飛出江湖魚鱗總蜉蝣
畜眼平生未曾識畫工何處寫汝真夢中曾到長須國
黑風吹海浪如山魚龍變化須臾間從龍願作先驅去
去上青天生羽翰

寄福建戴方伯

戴以御史董學政
於東南特承獎拔

東南士子說先生風裁森嚴鑒賞精再顧市中煩伯樂
一言堂下識駿明臺中自後人難繼吳下於今俗頓更
東望三山雲萬里春風朔雪不勝情

送刑部員外郎王存敬省祖

其祖百歲

風飄飄綬若若游子東歸樂復樂桃花流水思天台
父有書夜到來我今不去胡為哉世上何人年百歲
天厚吾人豈無意從今百歲又幾何來日苦少去日多
假令就有黃金百已去光陰誰買得百歲千金買不迴
一日三公換應直白玉為漿麟作脯子拜父前父拜祖
鄰人擁滿牆頭看何用長安為好官

送袁進士朗纂修

杏花才見曲江春
珥筆還看被命新
江上故人唯有子
周南外史豈無人
多方采問勞行李
當局編摩愧後薪
莫向雲間久畱滯
過家張翰不緣蓴

送石邦彥知汜水

春雨南宮夜
雙珠得並收
科名夸大宋
茂宰說中孚
赤縣前朝事
清河近日謳
折腰君莫厭
鳬舄豈淹畱

謝尚書挽詞

一變

長嘯乾坤內
如公復幾人
科名皆自鄧
文字本先秦
秦海

內瞻丰采朝端惜老臣履聲依北斗廟貌填南閩髮為
憂民種家從入仕貧人方起安石帝欲畀衡鈞國計訐
前箸工虞鄙筭緡忽為箕尾客昔忝鹿鳴賓傳授曾期
質褻揚却愧詵平生懷舊淚不敢污車茵

送李士欽祭淮瀆

相門餘舊業使命屬明禋典禮書三望文章覩一新拜
回桐栢暮行處告花春歸路恩光滿南陽有近親

士欽
人達

子南
陽人

雨中對梨花四首

一年花事又闌珊
自笑閒官不得閒
小巷梨花三日雨
一枝猶得舉杯看

誰道園中少物華
桃花開盡到梨花
霏微小雨添顏色
不用人家錦障遮

空庭香雪夜生輝
除却梅花見總非
一種風情還自別
始知西子勝楊妃

佳人默默立春寒
細雨輕風縞袂單
玉質似嫌脂粉澹

殘妝淨洗覓人看

始預經筵次匏菴韻

錦函初展御前題
劔佩分行再拜齊
鶴唳無聲香案側
馬蹏分賜掖垣西
文章正仰周家盛
玄默仍看漢道躋
聖主崇儒方此始
不才真復愧提携

匏菴約山行以秉之弟初至不赴

西山嘗向夢中登
騎馬相從却未能
春日山行應更好
新詩莫惜借人謔

次日艸亦以雨阻以詩來紀舊約


方冬海市見文登常怪坡翁自託能風雨十年曾有約
一翻詩案要重謄

送徐季止還南雍

仲山弟

悠悠復悠悠客眉鬱鬱今日開兩家兄弟各千里同日
報道從南來憶我行年十八九來往君家最云久君家
兄弟世所稀文采風流仍孝友吾家兄弟頗且蒙氣味
頗與君家同夜鐙對照南國雨春服同行沂上風今夕

何夕忽相見高樓夜月頻開燕人生會合那可常忽忽
城東又追餞吾家子由亦欲旋治任約共楓橋船勸君
為我還少住別後離愁分四處



震澤集卷一

欽定四庫全書

集部
震澤集卷三

詳校官中書_臣瞿 照

中書_臣劉源溥覆勘

總校官進士_臣朱 鈐

校對官學正_臣常 循

謄錄監生_臣王元愷

欽定四庫全書

震澤集卷二

明 王鏊 撰

詩

送東之還吳

不見倏七年相見只三月不知三月後又作幾時別
離苦多會苦少風雨蕭蕭竹窓曉自笑閒官日日忙夜
短情長談未了我生近僻寡朋儔坡云海內一子由只
今子由又欲去何以慰我平生愁子今去矣我何有為

買湖濱田十畝下栽禾黍上木奴菱芡荷花繞前後讀
書稍暇來朝班我却歸卧湖山間

對月有懷秉之

當時月出東海頭我居燕南子蘇州燕吳萬里同見月
兩人不見心悠悠豈知今宵月如舊照我兩人同舉酒
今照兩人喜昔照兩人悲臨風舉酒還問月悲喜唯應
有月知月明三五圓又缺遂使人間有離別碣石南頭
震澤西兩地愁心還望月欲知乃兄別後何所為月下

枯酒長獨持

吳禹疇副使使便還吳江覲省

重明瞻麗正弘治建初元聖作羣方覩星流使節奔費
蒙頒道里便喜過家門晝日方三接寒暄豈一言趨庭
嘗獨立加飯為平反王事真無暇親恩亦未諼銀魚羞
笠澤彩鷁動湘沅石建裙方滌王延被未溫法冠驚豸
立官誥訝鸞鵞鄉里恩光滿人生樂事繁萼香莫留戀
廐吏候行軒

陳給事王汝羞鼈見邀雨不克赴以鼈見饋作
詩謝之

虛負詩人折簡招滿城風雨晚蕭蕭眼前世事猶難料
巷口人家且不遙鼎謝繆公仍饋肉蟬憐畢卓獨持螯
雨晴明日還相過磊塊胸中要一澆

蘭竹

猗蘭漠漠幽人操修竹娟娟君子心空谷日斜人不
到可憐荆棘漫同林

送陳匯之正郎出知曹州

粉署才華藉甚稱一朝白壁點蒼蠅
邑中牛去真無妄
梁上刀懸夢豈曾冷暖世情還自笑
浮沉宦海本無憑
斯行却有曹人喜製錦從來是所能

送韓勛

都憲孫

先公老去吾猶及鐵面長身碧眼稜
海內安危真可佩
軍中韓范復誰能精忠已見回枯竹
奇事曾聞斷大藤
昭代象賢多不薄獨無雨露到雲仍

送王允常僉事之廣東

柳葉桃榔五嶺南使君曾此駐帷襜
法冠直指新峨廬
包匭生黎舊貢蚶不信鰐魚還作惡
只應泉水便名廉
殊方風土須珍重莫為溪山久滯淹

送周院判原已還任南京得杲字

前年送君城東亭今年送君城南道
年年長作送行人
每見君歸被君惱君生何好只好詩
捆載東歸揔詩草
玉延半舫最留連共月菴前亦傾倒
醉中勸我不如歸

只說金陵山水好人生出處誰得知世路東西難自保
難自保雲冥冥日杲杲

即事

忽而晴忽而雨細雨霏霏洗殘暑天意陰晴兩不期人
事炎涼遽如許遽如許黃葉秋林蟬獨語

半舫齋種竹

玉汝齋名

誰分碧玉兩三枝愛護先教槿作籬我欲醉移須有日
客從逕造却無時未分嶰谷陰陽管先和淇園瑟僊詩

多少世間凡草木歲寒時節始應知

送劉御史還蜀

規

浮世功名何有哉茅齋元住少城隈逢人老去腰難折
念母秋來首重回古栢祠前傷草色浣花溪上覓橙栽
臨邛父老如相過不似當時負弩來

送溫生廉還江西

傅學士
子壻

溫生穎邁仍好修問事不休賈長頭負牆請十不酬一
使我愧爾東家叟詩家不比春秋學三傳猶聞東高閣

夫何箋註鬬紛然混沌那堪七日鑿子今去矣我一言
為問乃翁然不然古人亦讀三百篇政也可達使可專
只今屈首窮心力郢書燕說滋紛惑鏤冰刻棘巧何為
名成至此敲門石不知清廟有遺音諷誦要於言外得
茲行不用感別離歸而求之有餘師

中秋夜超勝樓翫月

良宵歌管在高樓萬里青天一鑒沅絳闕珠宮真不夜
冰蟾玉兔揔宜秋興來且據胡牀坐醉後還驚大地浮

天柱峯頭何似此恍疑身到月宮遊

早起

紙窓斜漏白暗室未全明庭樹鳥爭噪鄰家鷄獨鳴四
牆猶鼾睡壯志獨潛驚萬古一昏曉淹留何所成

耳鳴

耳內真何有年來解作聲磬乎時殷殷蠅也只營營稍
向喧中息知從甚處生天應憐寂寞將爾當簫笙

顧氏三辰堂

顧野王家學有傳一經休說漢韋賢風雲慣得從龍便
嶺嶠爭誇覩鳳先天上星躔真有數吳中識語不其然
高堂要見三為四屈指從今又幾年

奉和鮑菴謝橘三首

買地還須共一都已留墨妙付官奴主人正似天隨子
家住烟波萬頃湖

何須千樹說玄都桃李從來是僕奴讀罷坡翁春色賦
坐令春酒變成湖

青李來禽亦甚都木奴應未肯為奴他年若論封侯事
乞取東山一曲湖

和玉汝謝橘

休說枇杷與荔奴楊家風味揔輸吾封侯且得依林屋
投老何須乞鑑湖江上秋風吹短髻天涯歲暮走長鬚
唾餘有子煩收寄一掬他年可百株

贈何醫士

中年多病稍相侵委巷衝寒屢見尋愧我且非當路客

因君真見古人心玉池洗藥流香遠金匱儲書燭理深
自笑貧家無以報只將詩句當南金

送僧歸西山

月明曾借上方眠竹几蒲團對夜禪落日故園心萬里
一雲飛處是吳天

史館歲暮述懷次匏韻

東觀才華說孟堅相隨無補漫窮年謹嚴敢意春秋筆
詮次惟將歲月編文案塵高傷病劣大官日給愧肥鮮

太平有象須君寫莫把三長讓子玄

除夜三首

明朝成四十今夜復斯湏天末幾年住山中三徑蕪無
聞良已矣漸老欲何如未免王融笑甘為武子愚

明朝成四十學道得蹉跎世事只如此流光奈爾何髮
從前日短愁向此時多獨飲屠蘇酒臨風一浩歌

明朝成四十萬事付因循乍見少而老相隨病與貧年
年仍故我得得且隨人鮑叔能知己王融莫笑人

送楊潤卿給事按貴州邊儲

翩翩文彩映珊瑚炯炯丰標玉不如才入鎖門司諫草
又從荒服按邊儲魚由丙穴應持酒雁到衡陽好寄書
回首前程雲萬里此行真是發硎初

送馮原孝知揚州

東南佳麗隔江分我昔登臨倚半醺瓜步帆檣天末見
竹西鼓吹月中聞高名自昔推揚一健足他年失翼羣
父老要知新太守聰明慈愛漢馮君

送林教授致政閩中

烏石岡頭碧水濱十年不見髮如銀
特從嶺嶠辭天子乞與林泉作主人
九牧衣冠還獨盛七閩風月未全貧
都門曉望車塵遠慙愧當年老却詵

秋試時林為同考得予文比之却林

一枝云

送陳進士恪知宿松

春風江上動牙樯鳬鳥南來面若霜
皖水繞城橫宛宛潯山當縣正蒼蒼
才名小試新磨劍筆勢曾驚古戰場

他日宿松還愛我鄰封咫尺是桐鄉

哭原已次匏韻

思穿溟滓刮幽荒郊賀由來命不長菊本無田寧當俸

杏雖有子搃成殤

原已號菊田無子

封題未了新詩債餘惠猶

存舊藥方昨日曝書開故篋忍看春蚓一行行

哭張修撰亨父次謝祭酒韻

清詩萬首敵千鍾身世飄然一短蓬早死賈生非不遇
後來揚子亦難逢豈知冀北空無馬須信人中亦有龍

珍重平生謝安石吳中不負若堂封

喜雨

翠華拂曙幸齋宮閔雨何煩紀魯公
晝氣混濛無殿閣夜聲淅瀝有梧桐
一時朝野歡皆洽三日天人感已通
祭罷雲開還出日太虛神聖本無功

次韻楊維立初入史館

東角門前十館開史家自昔總難才
病容野客隨行入遠喜諸公取次來
氣合每聯朝食坐事多長後午朝回

揚雄識字今誰及疑義須煩一一裁

李學士釋服諸公有詩趣入史館因次

東觀含毫有所思公翰旁睨已多時汗青頭白非無日
齒錄牙緋豈所期書到商家真灝灝心同魯國去遲遲
集賢諸老心如渴早雨公田及我私

次韻廉伯庶子晝寢

世情不合獨醒然午思騰騰只欲眠有約周公多邂逅
無情莊叟漫聯牽梨花院落春雲裏芳草池塘夕照邊

世事從來俱是夢北窗風月不須錢

贈河南巡撫楊貫之

熯災橫被十三州百萬蒼生手撫柔憲府乍臨新邑洛
宣房已復舊河流衣冠南渡仍餘宋漚澗東來尚自周
列郡分明望丰采安危須共主分憂

送高良新知歸州

江上青山識秭歸江邊弔古駐巖駢夢中馬耳先曾到
行處人烟亦已稀屈子宅空江渺渺昭君村在雨霏霏

使君撫字知多術，夔府如今正阻饑。

鄭氏鍾秀樓

隱居還谷口，擇勝向峯頭。天近星堪摘，湖平地若浮。雲嵐生几席，日月在簾鉤。何日同登覽，超然消我憂。

送僧如海還金澤

紫衣不掛白雲身，闕下多年作外臣。欲與高閑誇草聖，豈知賈島坐詩貧。禪心定久元無著，世事諳多總不嗔。他日吳中訪金澤，對酬誰作許家詢。

送建德尹蔣文廣致政還光福

京塵袞袞鬢毛斑
朝捧除書暮乞還
三徑已嫌陶令晚
一丘長伴謝公閒
仍知建德非吾土
免使移文自北山
光福楊梅今正熟
冰盤歸薦鶴頭丹

朱天成寄酒味變

橘林細擣洞庭霜
風味清甘早自將
小甕紅泥緘遠意
舫船玉粒饒餘香
督郵有郡還能至
宰相何知合備嘗
猶勝先生號烏有
車輪夜夜轉枯腸

九月晦日玉延亭看菊

秋盡燕南菊有華
品題猶自待詩家
酒澆屈子醒魂杳
燈晃西施醉影斜
九日風光今已負
百年世事亦無涯
升堂細碎還堪擷
杜老無庸晚見嗟

題竹贈陳御史瑞卿

玉立娟娟不受塵
崑山慣與竹傳神
冰霜高節知難並
捲贈烏臺鐵面人

送林方伯還閩

蘇學教授
智之子

安定蘇湖教獨行無能還愧老門生幾年濶別無消息
四海相逢是弟兄荀氏八龍俱騷裏唐家九牧世簪纓
燕山歲暮征車發把酒城東萬里情

朱天昭始第進士主余家至明年移居西鄰

兩年不厭草堂低頗愛晨昏出入齊長日經過無主客
祇今相見有東西濁醪尚可墻頭過歸院那愁柳下迷
廐馬似知人意思臨岐回首再三嘶

天昭子希周失解

前修未遠力須追中道無緣忽自疑
名似甘羅殊未蚤器如馬援不妨遲
卑高在手誰能定冷暖於人只自知
莫怪羲之羨懷祖瑤環重映碧梧枝

送汝行敏知南安

五馬南來百姓懽文章太守屬南安
郡中召父歌堪續壁上張顗字未漫
庾嶺梅華春信早吳江楓葉暮吟寒
到時境內人皆足每食無魚不用歎

聞南安魚頗難得

贈全卿

年來老眼旋生花學道無成似煮沙事業看君初發軔
文章笑我自成家懷嵇命駕殊忘遠說項逢人每似誇
鄉里衣冠今不乏且容老子誦南華

送顧承之還吉安省覲

秋風不用嘆差池利鈍仍知亦有時似我從前猶眊矂
看君自小已瑰奇楚弓一任他人得和璞惟應識者知
歸到安成春正好過庭還問幾篇詩

方巖書院次謝祭酒韻二首

祭酒李父寶
慶守所營也

謝家亭館盛當時絃誦俄聞發舊基鹿洞未能來賜額
菟裘兼可便吾私雨添書帶庭前草風動琅玕砌畔枝
自昔竹林誇放逸未應文彩似今奇

方山絕頂白雲銜問道來從九四成幾處人煙分海嶼
此公圖像合嵌巖訂訛無復遺魚豕擇術先須辨矢函
誰共舞雩沂上樂願隨童冠著春衫

送傅中舍曰會分封魯府

龍節歲蕤寶冊光手函青土向東方曾聞賜履開無棣

又見歸田自汶陽聽詔山東扶父老揮毫池上侍君王
別來好在西堂夢雨過池塘草正芳

曰會兄時
為學士

沽頭行三首贈陳水部

宣

上沽頭與下沽頭上下沽頭慣覆舟昨日使君臨堰上
沽頭上下是安流

沽頭落日沒人行白草茫茫一望平今日東西闌闌起
月明兩岸讀書聲

使君一日去沽頭父老兒啼婦女愁依舊沽頭成白草

荒煙古樹挂獼猴

送劉以初下第還常熟

三年京邸不窺園落筆翩翩動萬言
頗訝坡翁遺李豸
不同柳子賀參元
暗中得失真難定
夢裏輸贏未足論
月窟依然仙桂在
秋風獨鶴看橫騫

送陳員外子章分司蕪湖

東風吹浪碧粼粼
君去分司正值春
聞說為關非舊日
却思省試是比鄰
官曹正對蕪湖好
飲興初嘗采石醇

若遇經過煩借問行船多有洞庭人

寄汀漳守備西指揮

嘗守吳之
金山衛

幾年作鎮過龍溪記得將軍舊姓西
威洗沙尤烽盡滅政平海國貢初齊
金山別後多成望玉洞閒來且自躋
緩帶臨戎無一事花驄時向北風嘶

送陳堯弼知會稽

舊知
吳江

漢庭治遠無循吏千載吳江尚見之
備識民間多利病不知身上有安危
來時叔度常嫌暮去後何公每見思

今日會稽真奪取臨岐還作贈行詩

送張時學知遂安任叔順知定海

五色依然過眼迷常時文彩映玻瓈誰能滅沒空驪牡
又是連蜷賦彩霓七里灘搖江月冷四明山壓海天低
自慙未得為知己臨別新詩亦漫題

送白廷臣知崇仁

暗裏朱衣未足憑夜牕老眼霧層層長才自信工穿葉
短棹還思過採菱

廷臣家
採菱港

百里封疆看小試十年鄉榜

憶同登司徒事業君家事繼美無言尚未能

送周民則同知袁州

匡鼎談詩總不如春風下第獨慙吾誰云伯樂能知馬
可是齊王只好筭建業當時同折桂宜陽此日獨分符
人生得失應難料一命誰當是大夫

送吳大章還宜興

編修克
溫父

試罷彤廷便乞還不教名字落人間小園龍鳳春前雨
卷畫樓臺水面山文彩傳來多似舅功名老去只如閒

洞庭東望無多路楚頌亭成有舊顏

送錢正術還姑蘇

西館橋邊竹隱居昔年曾受異人書不知官爵能來子
可是塵埃早識予忽地相逢還宛若再煩推看定何如
韓蘇總被虛名誤試問三星是也無

送僧

當時六祖有傳衣萬法元來是一機若問一歸何處去
本來無一亦無歸

奉和謝氏三亭之韻

望海亭

方巖缺處著幽亭
岌業多應負巨靈
弱水蓬萊真可到
天台雁宕亦分停
蠶為帆起當總見
潮作風來吹酒醒
我欲更從高處望
齊州九點霧中青

仰高亭

亭上悠然坐見山
東西迴合隱如環
懸崖有路神先往
蔽桂無言手自攀
理到靜中應自得
事於身外不相關

金堂玉室分明在何事高人去不還

采藻亭

池邊小立駐幽芳異品真疑是樂浪

朝鮮紫片甚美

沙鳥自鳴

還自歇野人相見旋相忘擷來淺瀨和雲煮歸去傾筐
帶月湘欲獻吾皇還自媿蓼花蘋葉委秋霜

送謝祭酒之任南雝

峻節高懷自可親兩年史館況為鄰久甘靜退元非病
稠載詩篇亦未貧台右人才多近古當今師道復何人

看詳學制伊川在士子東南要一新

王汝看葵見寄

朝退歸來不坐衙門當委巷尚嫌譁不知半舫齋前竹
何似平廷院裏花清愛雨聲時起聽鶯愁日色每教遮
小軒清陰都非舊說與西人却似誇

古愚

我自古愚人還作古愚詩古賢不可作古愚亦難而舉
世皆尚同子獨不知時舉世誇疾走子行獨遲遲信口

所欲言信意所欲之夜不識寒燠路不識險夷喧然衆
知人指我為頑癡子知邈難及我愚恒若茲

寄題明秀樓

湖上危樓勢不崩北人欲上怯初登檐前月寫澄波影
天末雲留碧嶂層山水吳中誇獨勝觀游昔日記吾曾
弱流不隔蓬萊路欲去誰言病未能

送周進士炯還常熟覲省

同年近仁子

南宮此日謬持衡一見高文眼為明正喜故人能有子

忽聞遠別得無情名因實起何妨蚤理會心傳不厭精
此去海虞誰復見讀書長日掩柴荆

玉汝作東眺軒不忘在東諸君子也次其韻

長日過從興有餘官曹乖隔欲何如有時隱几全忘我
幾度敲門不是予磔磔林間鳴好鳥斑斑花外度輕車
城東有暇還相過賓席年來左特虛

諸葛武侯

漢家鹿走奔羣豪中原獨峙當塗高江東割據紫髯叟

大耳惶惶何所逃南陽南去隆中里草屋數間而已矣
悠然梁甫日長吟忍作卧龍終不起平生伊呂伯仲間
自比管樂真謙耳將軍三訪何太堅不臣不見禮則然
幡然一日起驅策海宇三分指顧間永安宮中翠華逝
王業偏安豈天意關張顛蹶趙雲亡漢祚終衰枉經濟
前出師後出師孤臣瀝血書肝脾渭濱敵退大星墜千
古英雄空淚垂

徐詹端壽詞

神社儲南嶽文昌麗北辰貞元符聖世間氣出賢人燕
市先招駿徐家舊座麟官曹憐我並德業許誰親自惜
無雙士同為不二臣性嫌長孺慙文許仲舒純幾共承
前席常容接後塵交情今鮑叔家世古楊椿已謂才無
敵仍知德有鄰看君心不展誨我語尤醇醉自忘公瑾
風如坐伯淳犀通雞自駭魚目俗空珍故業荆溪上新
恩少海垠良金真有價白璧豈無因每愧齊東士常叨
席上賓吳歌非子夜魯史又王春已自忘窮達何曾見

喜噴幾枝仙桂茁六葉墮萸勻大火西流近長庚下降
頻經綸當聖世弧矢屬秋旻寵渥今如是勲名定絕倫
莫歌昌熾頌座客製詞新

贈顧鏞

鏞顧仲英之孫仲英元季崑山巨家與楊鐵厓等為詩社有玉山草堂集仲英

子元巨國初徙籍鳳陽

玉山人去草堂存及見濠梁幾世孫傾蓋塗中成舊識
僑居淮上是清門前朝舊事猶能記南國遺風且莫論
莫怪題詩多感慨曾於名勝集中翻

太平鳥

有鳥有鳥名太平太平時節方來鳴當今天子神且聖
怪爾日夕無停聲人言此鳥亦如鳳不向梧桐愛萼華
上林何樹可相依萬年枝上春風動

送表兄葉志通

客從遠方來過我陋巷口十年積相思舉此一杯酒少
時同嬉戲今已成皓首行雲游四方寒郊折衰柳中年
常送別不似此分手昔時秦康公見舅如見母今我復

何為見兄如見舅

小適園桃花忽開

春來未識東風面忽在吾家小圃中
斜凭闌干成獨笑東西相映兩株紅

花開猶未報人知花下行吟漫自思
花若能言應笑我年年無酒只題詩

朝陵欲去更遲遲還向花前舉一卮
說與東風莫吹落我行三日是歸期

花落又作

報道花開方自喜忽聞花落更成傷
東風太是無情物故作春來一日狂

昨日日高猶爛漫今朝風動漸稀疎
我行三日歸來看只恐枝頭一片無

魚鱗滿地雪斑斑蝶怨蜂愁鶴慘顏
只有道人心似水花開花落總如閒

朝陵行

山行自好況清明朝陵偶作東門行

此日子獨行出安定門

青山

百里恣奇覽怪哉風伯何無情怒木驚沙鳴不息四野
無人日無色垂頭闔眼信馬行咫尺有山看不得昌平
少憇朝躋登眇眼一洗猶魯騰夜深星斗光若動黑雲
膚寸從東升歸程復指昌平郭萬竅號呼止還作曾聞
飄風不終朝我行三日三日惡平生萬事多乖違感爾
風伯能追隨前日相迎今日送眷戀豈要賡前題

舊有大風

聯句

還家頻面坐未定天日融和風寂靜

遊京城西山三首

賞心多與宦情違
三載來遊一日歸
樹下杯行殊草草
水邊人去更依依
郊原却畧青驄度
天水蒼茫白鳥飛
回首青山應笑我
漫將塵土浣苔衣

三年渴思玉山泉
濯足盤陀一爽然
寒漱石根鳴泱泱
光搖雲影靜娟娟
諸賢好作山陰會
老子仍工水底眠
汲得一瓢城裏去
霈為甘雨灑炎烟

出郊風物兩閒閒
眼底江南頓覺還
金闕五雲浮王氣

玉亭千古識龍顏地除揚子應無水天盡中原合有山
何事宋家三百載只披圖志望嶺岏

匏菴惠鶴

鴛鴦困雕籠鸚鵡桎金索人情雖甚憐物性終不樂不
如鶴性閒近人殊不愕雪中立伶俜風前步畧却或俛
啄蒼苔或側睨冥漠翛然物外情自得彼此各所以亦
樂園一名為一鶴歸來睇小園欠此殊寂寞清晨坐茅
齋蘇帖宛如昨人從玉延亭致此小窄寧應憐我家園

草樹頗荒落青泥黃葉間此物殊可著風清月夜時相應如唯諾鶴貌自孤高公意尤不薄便當掃園亭小池為汝鑿鶴鶴來我前今日與汝約汝本九臯禽非人可籠絡既為詩家玩又受主翁托有木從汝棲有泉從汝淪雖無乘軒貴止此亦不惡切勿隘吾園不足恣飛躍一朝凌天風萬里向寥廓

代簡速仲山

仲山將使河南

漸覺交游少常嫌公務忙印初辭省內節未向河陽天

遣閒多日君常醉幾場貧猶能釀酒病不廢詩章竹卷
題堪續茅齋興甚長可能醒過日況是語同鄉道里東
西近情懷爾汝忘比來閒可得別後望徒傷坐只匏分
席香餘菊佐觴便來同一醉鄭驛不治裝

匏菴和樂天五十八歸來因同賦

五十八歸來於我似差速其如迂懶性世事昧五六多
病況早衰湏髻失舊綠辭家今幾年但看庭前木寸根
手自移今已如立竹從公歸去來家住湖山足

送陳郎中一變錄囚

西曹社友多分散，獨有夫君又別離。
雨露九天疎滯獄，關河千里赴襟期。
篇章自愛陳無已，經義多推雋不疑。
他日歸朝敷奏罷，解裝還有幾篇詩。

匏菴臂疾予問之偶遲有詩見貽次其韻

偶因請告得閒身，子墨依然日見親。
湯媪曾聞能作祟，

匏有湯媪傳

竹奴何事亦欺人。

疾以竹簾致

堂前客至惟長揖，池

上詩成一欠伸。自笑東鄰來問疾，如何翻後陸徐陳。

送張學士廷祥之南京

除書一紙墨淋漓
同向彤廷舞蹈時
實錄兩朝無字愧
高名四海是人知
東山強為君恩起
南國多因母老移
門對鍾峯無一事
日高睡起好題詩

郊祀齋宮次仲山韻

爐烟起處望行宮
狹陞登呼拜舞同
九色繡旗斜晃日
兩行銀甲儼趨風
圜丘絕壑飛橋過
傑閣凌虛複道通
獲觀明禋誇盛事
不才深愧後諸公

贈梁都憲巡撫四川

赤甲白鹽雄作鎮
鐵冠繡斧凜先聲
雪山已為來時重
黑水應聞去後清
殿上位虛中執法
邊頭人散小團營
憑誰說與蘇明允
畫像無煩記姓名

震澤集卷二